

Date – 11/10/2025

Time - 7:30 Hrs

HEADLINES (MORNING)

1. Hnahthialah Lok Sabha MP, Pu Richard Vanlalhmangaiha kaihruiin nimin khan District Development Coordination and Monitoring Committee neih a ni .
2. Chief Secretary Pu Khilli Ram Meena an nimin khan Central Jail a tlawh.
3. Prime Minister Narendra Modia chuan vawiinah sawrkar laipui hmalakna lian tak PM Dhan-Dhaanya Yojana leh Self Reliance in Pulses Mission New Delhi-ah a hawng dawn.
4. Israel leh Hamas ten inkahhai an puan chu nimin tlai atang khan hman tan a ni.

<><><>

HNAHTHIAL DISHA

Hnahthialah Lok Sabha MP, Pu Richard Vanlalhmangaiha kaihruiin South Tuipui bialtu MLA Pu Jeje Lalpekhlua nen Hnahthial Dstrict chhunga Head of Office hrang hrangte nen nimin khan District Development Coordination and Monitoring Committee (DISHA) neih a ni a. Meeting-ah hian Hnahthial District-a Department hrang hrang 17 te chuan kum 2025-26 chhunga an hmalakna report thlirho a ni.

MP chuan Line department-te inbuatsaihna leh hna thawh tawhna te chu fakin, hlawhtling leh awmze nei zawka hmasawna hna thawh kalpui a nih theih nan department hrang hrangte chu an hma zawn theuhvah theihtawp chhuah chhonzawm zel turin a chah a ni. Sawrkar Laipui Scheme kalpuinaa harsatna awmte pawh inthlahrung lova a hnena thlen thin tura chahin, a theih ang anga chin fel dan ngaihtuahpui a inhuam thu a tarlang a ni.

Meeting-ah hian Hnahthial District-a Department hrang hrang 17-ten kum 2025-26 chhunga Central Scheme hnuaiia an hmalakna langsar zualte tarlan a ni.

He hunah hian MGNREGA hnuaiiah Job Card nei mi 7065 an awm mek thu tarlangin FY 2025-26 ah mi 63 inhlawhna pek a nih tawh thu tarlang a ni a. SASCI hnuaiiah Library 15 sak zawh tawh niin MzSRLM hnuaiiah SHG - 699 awmin, VO - 33 leh CLF - 4 a awm mek. PMAY-G hnuaiiah in 265 sak zawh tawh niin, sak mek 84 a awm. WDC-PMKSY hnuaiiah S.Chawngtui, Tarpho leh Khawhri ah hmalak mek a ni.

Sericulture Dept -in Silk Samagra -2 hnuaiiah progress partner mi 10 (eri culture) leh mi 37 (muga silkworm) hnenah tanpuina an pe tawh.

UD & PA Dept-in PMAY-U hnuaiiah insak tanpuina mi 390 hnenah final payment an pe tawh a. DAY- NULM hnuaiiah District Hospital , Hnahthial ah Patient Attendant Shelter leh Bazar Vengah Public Toilet an sa bawk.

<><><>

MZP CALLED ON GUV

MZP General Headquarters hruaitute chuan nimin khan Larsap General (Rtd) Vijay Kumar Singh chu Raj Bhavan ah hmuin Mizo zirlaite tana hamthatna hrang hrang ngaihtuah pui turin an ngen.

An Inkawmna ah hian Larsap chuan, MZP hruaitu tharte chu duhsakna hlanin ram leh hnam zirlaite tana an hnathawh leh hruaitu hluite inpekna chu fakawm a tih thu a sawi a, MZP in kum 90 a tling ta chu lawmawm a tih thu sawiin, ni 27 thawhtanni chu 'Zirlaite Ni' leh MZP din champhaphak a nih angin zirlaite hnehah thuchah sawi a tum thu a sawi bawk.

He hunah hian, MZP hruaitute chuan, Governor hnenah hian term hmasa lama Union Home Minister hnen a an thlen hmun hrang hranga awm zirlai 100 tana Nation Integration Tour hlawhtling taka Border Security Force (BSF) ruahmanna a tour an lo buatsaih tawh chungchang sawipuiin, remchang hmasa berah College zirlaite tan tour buatsaih a nih ve leh theih nan a hmalak pui turin an sawm a, Coaching Institution tha a mizo zirlai tam zawk an kal theihna tur ngaihtuahpui turin an thlen a ni.

Larsap chuan, sawrkar nena hma la in mizo thalai tam zawkin a coaching institution tha an an kal theihna tur leh Mizoram chhung chauh nilo state dang leh India ram pawn thleng a hnathawk tura an in buatsaih a ngaih thu a sawi a, Placement Agency chah lut in, Mizoram-a job fair an neih theih nan ngaihtuahpui a tum thu a sawi a, Mizo thalaite ruihhlo laka kan fihlim theih nan, middle leh High school level ah nasa leh zual a awareness neih tuma hma an lak mekna chu tha tiin, a theih ang anga hmalak pui a a tum thu a sawi bawk.

<><><>

CENTRAL JAIL

Chief Secretary Pu Khilli Ram Meena an nimin khan Central Jail a tlawh a,

Central Jail chhunga ICTC (Integrated Counseling and Test Centre), Library, Computer Centre, Legal Aid Centre leh Convict Ward a fang a, Prisoners Welfare Committee (PWC) hruaitute kawmin, nitin an hun hman dan te, an hriselna chungchang leh an ei leh in chungchang te, harsatna an neih leh neih loh te a zawt a. ICTC viltu Dr. CT.Lalruatkima leh staff te kawmin, Jail tangte hriselna dinhmun leh an enkawl dan te a zawt bawk.

Sawrkar thuchhuah tarlan danin Central Jail ah hian tun dinhmunah mi 928 tang mekin heng zingah hian dam chhung tang tur mi 54 an awm a, Central Women's Jail ah chuan mi 152 an awm a, heng zingah hian naupang 9 an awm ve bawk a ni.

Central Jail hi kum 1986 a din niin a building a hluuin, a chhe tawh hle a. Tunah hian SASCI Part I hnuai atangin cheng vaibelchhe 13 senga sak that turin ruahmanna chak taka kalpui mek a ni a. Chief Secretary Pu Khilli Ram Meena chuan hnathawh theih hun chhunga a tam thei ang bera hna thawk hman tura inpuahchahna felfai tak neih a tul thu concern official te a hrilh bawk.

<><><>

MPSC

Mizoram Sorkar chuan MPSC hnathawh thin mek siam belhin, Mizoram Sorkar department hnuai direct recruitment hmanga hna lak reng rengah MPSC-in zawhna siam vek turin MPSC limitation of functions a siam tha a. 'The Mizoram Public Service Commission (limitation of functions) (Amendment) regulations, 2025 chu Gazette-ah sept ni 24 khan a chhuah. Kan corr report lo ngaithla ang.

Tuna sorkar kalphung dinglai ah chuan Pay level-05 leh a hnuai lam chu department-in zawhna a siam bakah hna lak a buaipui thin a, MPSC hian Pay level-06 leh a chung lam a khawih thung a ni. Sorkar-in ruahmanna thar a siam dan chuan Sorkar department hnuai direct recruitment-a hna lak tur reng reng ah chuan, department-in a khawih chinah pawh question set chu MPSC chauh in an ti tur tih a ni a. Hei hi department ten MPSC hnenah an thlen thin ang tih a ni. Question set bakah hian exam kaihnawih dang chhanna endik leh a tul dangte ah MPSC rawn hmasa chungin, Department ten MPSC hi hna lak chungchangah an puihna an dil thei ang tih a ni bawk.

<><><>

PANCHAYAT BHAVAN

Rural Development Minister Prof. Lalnilawma an MLA fund hmanga sak Panchayat Bhawan chu nimin khan Keifang Leitanah a hawng.

Pu Lalnilawma chuan thu sawiin, mipuiten an mamawhte sawrkar hnena an thlen te chu chhinchhiahin, theih ang anga hma an lak thin thu a sawi a. Keifang Leitan YMA te pawhin community hall an mamawh avangin a kawng te dapin Panchayat Hall tha tak sak a lo ni ta a ni, a ti a, a hming avangin VC ta bik a ni kher lo tih sawiin khawtlang mipui a mamawh apiang tan a nih thu a sawi bawk.

Pu Lalnilawma chuan Panchayat Bhawan chu chhawng thuma sak tura rua hman a ni, a ti a, tun dinhmunah chhawng khata sak niin, bul an tan tawh a, tawpsan mai an tum loh thu a sawi bawk. Minister chuan sawrkarin building tam tak a sa tawh thin tih a sawi a, hmang tangkai tam tak an awm laiin hmang tangkai lo leh dah awngrawp ta mai an awm thin chu pawh a tih thu a sawi.

Minister chuan Panchayat Bhawan chu khawtlang mipuiten a tangkai thei ang bera an hman a beisei thu a sawi a, intineitu bik awm loa a mamawh apiangin an hman theih nan a duhsakna a hlan a, a enkawl leh thawm that kawngah pawh sawrkar phut kher loa mawhphurna la thin turin kalkhawmte chu a chah nghal a ni.

Keifang Leitana Panchayat Bhawan hi cheng nuai 100 hmanga sak a ni a, financial year 2025-2026 chhunga sak tura rua hman a ni. Tun dinhmunah chhawng khata sak a ni a, a chung lam sak belh theih tura duan a ni. He Panchayat Bhawan hi lir nghing pawh dawl zo turin ban nghet tak nena sak a ni a, tui hna tha tak a awm nghal bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

PROJECT PERIOD PRIDE

Lunglei District-a hmeichhe zirlai naupangte zinga hmeichhe hun bi thi neih kaihhnawih hriselna leh thianghlimna chungchang inzirtirna atana Lunglei District Bawrh sap hma lakna, "Project Period Pride" hnuai ah nimin khan Lungsen Aspirational Block huam chhunga Rangte leh Phairuankai khuaahte inhrilhzauna hun buatsaih a ni.

"Awareness Programme on Menstrual Health & Hygiene" hi Lunglei Deputy Commissioner, Health & Family Welfare Department, School Education Department leh Women & Child Development Department te tang ho huaihawt a ni a. Rangte Community Hall-ah Government Middle School, Rangte leh RMSA Secondary School, Rangte zirlaite tan hun buatsaih niin, zirlai 52 an tel a. Chawhnu lamah Government Middle School, Phairuankai leh RMSA Secondary School, Phairuankai zirlaite tan Government Middle School, Phairuankaiah hun buatsaih ni thungin, zirlai 47 an tel bawk.

He'ng awareness programme buatsaihah hian Lungsen Primary Health Centre (PHC)-a Medical Officer Dr Lalremruati'n hmeichhe thla kip hun bi chungchang bakah, hriselna leh thianghlimna kawnga hriat tur pawimawh hrang hrang a zirtir a. Lungsen ICDS Project-a Child Development Project Officer Pu Vanlalsanga'n nu leh naupang hriselna atana ICDS hnuai hma lakna a sawi fiah bawk a ni.

<><><>

PM

Prime Minister Narendra Modia chuan vawiinah sawrkar laipui hmalakna lian tak PM Dhan-Dhaanya Yojana leh Self Reliance in Pulses Mission New Delhi-ah a hawng dawn. He hunah hian PM Modia chuan loneitute nen inkawmna hun a hmang dawn bawk a. He programme hi sawrkarin loneitute a ngaih pawimawh ziate, agriculture lama intodelh tura hma alakna leh thingtlanga hmasawna ruhrel tihchangtlun a ngaihpawimawh zia tihlanna pakhat a ni a.

Kan Corresponent sawidanin PM Dhan Dhaanya Krishi Yojana ah hian cheng vaibelchhe sing 2 leh sang 4 chuang ruahman a ni a. Loneitute thlai thar tihpun te, tum khata thlai chi hrang tam zawk chin theihna tura hmalakna leh loneih dan tlo zawk kalpuina tur a ni a. Self Reliance in Pulses Mission hi be lam chi a intodelhna tur hmalakna niin cheng vaibelchhe sing 1 leh sang 1 ruahman a ni bawk.

<><><>

ISRAEL & HAMAS

Israel leh Hamas ten inkahhai an puan chu nimin tlai atang khan hman tan a ni a. Israel Defence Forces (IDF) te chuan Gaza-a inkahhai an puan thu sawiin an sipaite pawh an laklet tur thu an sawi a ni. He inremna ang hian Hamas te chuan an mi hren te an chhuah vek dawn a. Israel Prime Minister Benjami Netanyahu chuan an ramin he indonaah hian hlawhtlinna ropui tak an chang tih sawiin Hamas kuta mi tang thi leh damte lak kir vek chu an tum ber anih thu a sawi a ni.

<><><>